

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

ZAKON

**O IZMJENAMA ZAKONA O ADVOKATURI FEDERACIJE BOSNE I
HERCEGOVINE**

Sarajevo, januar 2020. godine

PRIJEDLOG ZA DONOŠENJE ZAKONA PO SKRAĆENOM POSTUPKU

Vlada Federacije Bosne i Hercegovine predlaže Parlamentu Federacije Bosne i Hercegovine da, u skladu sa članom 172. Poslovnika Predstavničkog doma Parlamenta Federacije Bosne i Hercegovine ("Službene novine Federacije BiH", br. 69/07 i 2/08) i članom 164. Poslovnika o radu Doma naroda Parlamenta Federacije Bosne i Hercegovine ("Službene novine Federacije BiH", br. 27/03 i 21/09), Prijedlog zakona o izmjenama Zakona o advokaturi Federacije Bosne i Hercegovine razmatra i donese po skraćenom postupku.

Uzimajući u obzir činjenicu da primjena aktuelne tarife o nagradama i naknadi troškova za rad advokata u Federaciji Bosne i Hercegovine proizvodi značajna finansijska opterećenja po budžetska sredstva, neophodno je pristupiti predloženoj izmjeni zakona, kako bi se definirao pravni osnov za uređenje ove oblasti putem podzakonskog akta koji bi donijelo Federalno ministarstvo pravde.

Z A K O N

O IZMJENAMA ZAKONA O ADVOKATURI FEDERACIJE BOSNE I HERCEGOVINE

Član 1.

U Zakonu o advokaturi Federacije Bosne i Hercegovine („Službene novine Federacije BiH“, br. 25/02, 40/02, 29/03, 18/05, 68/05 i 42/11), u članu 31. stav 2. mijenja se i glasi:

„(2) Tarifu donosi Federalno ministarstvo pravde uz konsultacije sa Advokatskom komorom Federacije Bosne i Hercegovine.“

Stav 7. mijenja se i glasi:

„(7) Za odbrane po službenoj dužnosti, visinu nagrade za rad advokata utvrđuje Federalno ministarstvo pravde.“

Član 2.

Ovaj zakon stupa na snagu osmog dana od dana objavljivanja u „Službenim novinama Federacije BiH“.

O B R A Z L O Ž E N J E

ZAKONA O IZMJENAMA ZAKONA O ADVOKATURI FEDERACIJE BOSNE I HERCEGOVINE

I. – USTAVNI OSNOV

Ustavnopravni osnov za donošenje ovog zakona sadržan je u odredbi člana IV.A.20. (1) d) Ustava Federacije Bosne i Hercegovine, kojim je propisano, da je Parlament Federacije Bosne i Hercegovine nadležan za donošenje zakona o vršenju funkcije federalne vlasti.

Ustavnopravni osnov za donošenje ovog zakona je utvrđen prilikom njegovog prvog usvajanja i ovaj zakon je do sada više puta mijenjan.

II. – RAZLOG ZA DONOŠENJE ZAKONA

Osnovni razlog za donošenje ovog zakona jeste osiguranje uslova za provođenje zaključka Doma naroda Parlamenta Federacije BiH, broj: 02-02-1915/19 od 14.11.2019. godine, kojim se Federalno ministarstvo pravde zadužuje da u skladu sa svojim nadležnostima izvrši izmjene tarife o nagradama i naknadama notara i advokata, te da u roku od 30 dana uskladi usluge na način da njihovu visinu prilagodi standardu građana Federacije BiH, odnosno njihovim imovinskim prilikama umanjujući iznose tarifa u odgovarajućem postotku. Uzimajući u obzir činjenicu da je odredbom člana 31. stav (2) važećeg Zakona o advokaturi Federacije Bosne i Hercegovine propisano da Skupština Federalne advokatske komore predlaže tarifu koju odobrava Federalno ministarstvo pravde nakon konsultacija sa ostalim relevantnim ministarstvima, navedenu odredbu je potrebno izmijeniti kako bi se definirala jasna uloga Federalnog ministarstva pravde u samostalnom donošenju tarife o nagradama i naknadi troškova za rad advokata, te kako bi se u tom smislu osigurali uslovi za provođenje navedenog zaključka Doma naroda Parlamenta Federacije BiH. Dakle, navedenom izmijenjenom odredbom propisuje se da Tarifu o nagradama i naknadi troškova za rad advokata donosi Federalno ministarstvo pravde uz konsultacije sa Advokatskom komorom Federacije Bosne i Hercegovine.

Razlog za donošenje ovog zakona, također, predstavlja propisivanje pravnog osnova za donošenje posebnog podzakonskog akta kojim bi se uredilo pitanje nagrade za rad advokata po službenoj dužnosti. Uzimajući u obzir činjenicu da je u Federaciji Bosne i Hercegovine u primjeni Zakon o advokaturi Federacije Bosne i Hercegovine koji je predvidio donošenje Tarife o nagradama i naknadi troškova za rad advokata u Federaciji Bosne i Hercegovine isti nije sadržavao odredbu kojom bi se uredilo pitanje nagrada za rad advokata po službenoj dužnosti.

Uzimajući u obzir činjenicu da primjena aktuelne tarife o nagradama i naknadi troškova za rad advokata u Federaciji Bosne i Hercegovine proizvodi značajna finansijska opterećenja po budžetska sredstva, neophodno je pristupiti predloženoj izmjeni zakona, kako bi se definirao pravni osnov za uređenje ove oblasti putem podzakonskog akta koji bi donijelo Federalno ministarstvo pravde.

Predloženo zakonsko rješenje je na tragu zakonskog rješenja u Republici Hrvatskoj i Republici Srbiji gdje je pitanje nagrada za rad advokata po službenoj dužnosti propisano na način da je isti propisan podzakonskim propisom koji donosi ministar pravosuđa, dok aktuelno zakonodavstvo u Republici Srpskoj predviđa da visinu nagrade i naknade za odbrane po službenoj dužnosti utvrđuje Vlada Republike Srpske na prijedlog ministra pravde.

III. – FINANSIJSKA SREDSTVA

Za provođenje ovog zakona nije potrebno osigurati dodatna finansijska sredstva u Budžetu Federacije BiH.

**Zakon o advokaturi Federacije Bosne i Hercegovine
(„Službene novine Federacije BiH“, br. 25/02, 40/02, 29/03, 18/05, 68/05 i 42/11)
- ODREDBA ZAKONA KOJA SE MIJENJA -**

Član 31.

Tarifa o nagradama i naknadi troškova za rad advokata (u daljem tekstu: Tarifa) određuje nagrade za rad i troškove nastale vršenjem advokatske djelatnosti kao i primjenu i stupanje na snagu ove tarife.

Skupština Federalne advokatske komore predlaže Tarifu koju odobrava Federalno ministarstvo pravde nakon konsultacija sa ostalim relevantnim ministarstvima.

Tarifa se objavljuje u "Službenim novinama Federacije BiH".

Advokat ima pravo da zahtijeva i da primi nagradu za izvršeni rad i nadoknadu troškova nastalih u vezi s radom, u skladu sa odredbama Tarife.

Nagrada advokatima za pruženu pravnu pomoć stranci na Sudu ili pred drugim tijelima u toku jedne rasprave ili jedne poduzete pravne radnje (pismena) u: parničnom i izvanparničnom postupku, krivičnom postupku, postupku stečaja i likvidacije, zemljišno-knjižnom postupku, upravnom postupku, upravnom sporu, izvršnom postupku, postupku za upis u registar društva, postupku pred Ustavnim sudom Federacije Bosne i Hercegovine i Ustavnim sudom Bosne i Hercegovine, odnosno svim drugim radnjama koje poduzima advokat pružajući pravnu pomoć stranci, ne može prelaziti jednomjesečni prosječni lični dohodak u Federaciji Bosne i Hercegovine.

Sudovi i druga državna tijela u Odluci o troškovima postupka advokata za pružanje pravne pomoći stranci određivat će nagradu advokatu prema odredbama stava 5. ovoga člana ukoliko je nagrada advokatu prema advokatskoj tarifi viša od iznosa iz stava 5., osim ukoliko je advokat sa svojim klijentom ugovorio visinu nagrade u pisanom obliku u skladu sa važećim propisima, što ne može opteretiti suprotnu stranu.

Skupština Advokatske komore Federacije Bosne i Hercegovine uskladit će advokatsku tarifu s odredbama iz stava 5. ovoga člana.